



NEWSLETTER OLIMPIJSKOG KOMITETA BiH

No.2, juli 2020



RIJEČ PREDsjedNIKA OK BiH

Dragi sportisti i sportski radnici, zadovoljstvo nam je prezentirati vam drugu ediciju Newsletter-a Olimpijskog komiteta Bosne i Hercegovine.

U skladu sa globalnom situacijom koja ima velike reperkusije na sport u Bosni i Hercegovini, Evropi i svijetu, u ovom trenutku naš fokus je usmjeren ka edukaciji i realizaciji projekata usavršavanja menadžerskih praksi u sportskim organizacijama. Olimpijski komitet BiH je organizacija koja uči i pravi transfer znanja u sportskom sistemu i šire. S tim u vezi smo kao prvi Olimpijski komitet u regiji

preveli i publikovali „Priručnik za sportsku administraciju“ Međunarodnog olimpijskog komiteta. Ova izvrsna knjiga sadrži jasne upute i nudi rješenja za naše sportske saveze i sport uopšte.

Od izuzetne važnosti je da sportski strukovni savezi shvate moć i potrebu cjeloživotnog učenja i usavršavanja u oblastima kojima se bave. Istu praksu primjenjujemo i u Olimpijskom komitetu BiH gdje su nedavno dva uposlenika uspješno odbranila doktorsku disertaciju iz oblasti sportskog sistema BiH, jedan uposlenik je završio master program iz sportske administracije i jedan dodiplomski studij iz oblasti menadžmenta u sportu. OK BiH je organizacija koja se permanentno usavršava kako bi zadovoljila standarde i izazove modernog sporta i samim tim zajedno sa svima Vama unaprijedila sportski sistem naše zemlje.

Koristim priliku da Vas zamolim da budete odgovorni, da čuvate svoju porodicu, prijatelje i radne kolege, te da krizu shvatite kao šansu za nove sportske i druge uspjehe. Ostanite nam zdravi i aktivni.

S poštovanjem,

**Prof.dr Izet Rađo
Predsjednik OK BiH**

IN MEMORIAM - JANEZ KOCIJANČIČ (1941-2020)

Predsjednik Evropskih olimpijskih komiteta

Dr Janez Kocijančič bio je osmi predsjednik Evropskih Olimpijskih komiteta EOK (2017 - 2020). Preminuo je 1. juna 2020. godine poslije iznenadne i teške bolesti.

Predsjednika Kocijančiča pamtit ćemo kao velikog čovjeka i prijatelja Bosne i Hercegovine i Olimpijskog komiteta BiH. Bio je ambasador i promotor Olimpijskog pokreta, te istinski pobornik Olimpijskih vrijednosti, edukacije, mira i društvene uključenosti.



U nastavku prisjetimo se riječi predsjednika Kocijančiča tokom obraćanja Generalnoj skupštini ANOK-a, 2019. godine:

Olimpijski plamen se ponovo vratio u ovaj grad 35 godina od održavanja Olimpijskih igara u Sarajevu. Nakon Olimpijskih igara se desio strašan rat u kojem je mnogo ljudi izgubilo živote i mnogi su raseljeni. Onda je došao EYOF 2019 Sarajevo i Istočno Sarajevo, gdje se na Olimpijskom stadionu Koševo održala ceremonija otvaranja sa 30.000 gledalaca u stadionu i 10.000 gledalaca koji su ostali van stadiona sa željom da prisustvuju ceremoniji otvaranja. Šta to znači?! Ljudi su željeli reći sami sebi, svojim vođama, Olimpijskom pokretu i cijelom svijetu da su prezasićeni sa animozitetima, mržnjom i razdvajanjima i da žele da idu putem kojim ide sport. To je bila snažna poruka za sve nas. Kasnije smo uživali u odlično organizovanom EYOF-u, i to je bilo veliko ohrabrenje za sve nas u Olimpijskom pokretu.

In memoriam video EOK-a posvećen dr Kocijančiču pogledajte na ovom [linku](#).

GODIŠNJICA OSNIVANJA OK BiH



Prije 28 godina, 04. juna osnovan je Olimpijski komitet Bosne i Hercegovine.

Osnivačkom skupštinom, tog 4. juna 1992. godine, rukovodilo je radno Predsjedništvo u sastavu Ahmed Karabegović, Čedo Gojković i Miroslav Šipek, a Stjepan Kljuić izabran je za prvog predsjednika Komiteta.

Nakon osnivanja i prvog nastupa sportista naše države na Olimpijskim igrama u Barceloni 1992. godine, što je ujedno bila i prva velika pobjeda ljudi odanih sportu, koji su u našoj zemlji u teškom ratnom vremenu sačuvali olimpijsko naslijeđe od totalnog uništenja, 24. septembra 1993. godine u Monaku, OK BiH je zvanično priznat i od strane Međunarodnog olimpijskog komiteta.

OK BiH je, potom, 8. decembra 2002. godine upisan u registar Ministarstva pravde kao prva sportska organizacija u koju se udružuju nacionalni sportski savezi. Upisom u ovaj registar, kao i potpisom Lozanske deklaracije od 28. jula 1999. godine, konstituisano je u krovno sportsko tijelo države Bosne i Hercegovine.

Olimpijski komitet BiH danas je kredibilna međunarodna organizacija koja olimpijskim nadama osigurava višegodišnje olimpijske stipendije, finansira njihove finalne pripreme za takmičenja, razvija kampove i projekte podrške obrazovanju, edukuje trenere te podstiče razvoj državne sportske strukture kroz čvršće organizovanje sportskih saveza.

Olimpijski komitet BiH zajedno sa gradovima domaćinima, organizovao je i uspješno proveo najveće Zimsko olimpijsko takmičenje u Evropi "EYOF 2019" i pored kompleksne situacije u našoj državi. Olimpijski komitet BiH, između ostalog, osim edukativnih, u proteklih 28 godina realizovao je i specijalne infrastrukturne projekte Međunarodnog olimpijskog komiteta, a koji su bili usmjereni na obnovu Zetre i sjedišta Olimpijskog komiteta BiH, a obnovljena je i zgrada Olimpijskog muzeja koja je bila razrušena.

Od 1992. do danas Olimpijski komitet učestvovao je na 54 takmičenja sa više od 1.000 najboljih sportista, reprezentativaca naše države. Osvojene su 43 medalje i to šest zlatnih, 12 srebrenih i 25 bronzanih. Prve medalje Bosni i Hercegovini podarili su na Mediteranskim igrama u Monpeljeu 1993. karatista Eldin Pekmez - bronza, a prve zlatne bokser Almedin Fetahović i košarkašice predvođene Razom Mujanović.

Prvi Izvršni komitet su sačinjavali istaknuti olimpijci, sportisti i sportski radnici: Mirza Delibašić, Mirsad Fazlagić, Čedo Gojković, Ahmed Karabegović, Dragan Nožica, Ante Raos, Mehmed Sokolović, Miroslav Šipek i Katica Šporer.

Funkciju Predsjednika Olimpijskog komiteta BiH do sada su obnašali: Stjepan Kljuić, Bogić Bogičević, Ahmed Karabegović, Ljiljanko Naletilić, Zdravko Rađenović, prof.dr Milanko Mučibabić, prof.dr Nada Avdibašić-Vukadinović, Siniša Kisić, Marijan Kvesić i prof.dr Izet Rađo, dok su funkciju generalnog sekretara obnašali: Izudin Filipović, Sejdalija Mustafić i dr sci.Said Fazlagić.

Više o Olimpijskom komitetu možete pronaći [ovdje](#).

PROF. DR MILANKO MUČIBABIĆ, ČLAN IZVRŠNOG KOMITETA OK BiH, KOOPTIRAN U PREDSJEDNIŠTVO OLIMPIJSKOG KOMITETA BiH

Na 29. redovnoj sjednici Izvršnog komiteta OK BiH u skladu sa Statutom OK BiH, prof. dr Milanko Mučibabić, član Izvršnog komiteta OK BiH, kooptiran je u Predsjedništvo OK BiH.

Prof. dr Milanko Mučibabić je Univerzitetski profesor, bivši predsjednik OK BiH i dugogodišnji član Izvršnog komiteta OK BiH, te doajen džudo sporta i trenutni veteranski šampion svijeta.



SVEČANO OTVARANJE OLIMPIJSKOG MUZEJA

Poslije višegodišnjih napora, truda i rada, Olimpijski komitet Bosne i Hercegovine sa ponosom najavljuje svečano otvaranje Olimpijskog muzeja, 09. oktobra 2020. godine.



Olimpijski komitet BiH uputio je poziv predsjedniku Međunarodnog Olimpijskog komiteta Thomasu Bachu koji će, ukoliko COVID-19 situacija to bude omogućila, lično otvoriti renovirani Olimpijski muzej, ili se prisutnima obratiti putem video linka. Svoje prisustvo svečanom otvaranju Muzeja potvrdio je Princ Albert II od Monaka.

Novoobnovljenu zgradu Olimpijskog muzeja posjetili su i članovi Izvršnog komiteta Olimpijskog komiteta BiH, te su imali priliku prisustvovati pripremama za postavljanje stalne postavke.

Više o Olimpijskom muzeju možete pročitati [ovdje](#).

PREDSTAVLJAMO VAM PRIRUČNIK ZA SPORTSKU ADMINISTRACIJU MEĐUNARODNOG OLIMPIJSKOG KOMITETA U PUBLIKACIJI OLIMPIJSKOG KOMITETA BOSNE I HERCEGOVINE

Olimpijski komitet BiH odlučio je prevesti i publikovati [Priručnik](#) za sportsku administraciju Međunarodnog olimpijskog komiteta koji odražava savremena znanja, prakse i izazove sportske administracije u Olimpijskom pokretu. Kombinacija sportsko-specifičnih uputa i opštih savjeta po pitanju sportske administracije, razvoja sportista, promocije Olimpijskih vrijednosti i druge teme sadržane su u ovom izvanrednom Priručniku.



Osvrćući se na samu namjeru MOK-a u koncipiranju ovog Priručnika, intencija Olimpijskog komiteta BiH je da pomogne sportskim organizacijama u BiH da usvoje i utvrde principe dobrog upravljanja sportskim organizacijama sa ciljem upravljanja promjenama u modernom sportu.

NA POMOLU OSNIVANJE JOŠ JEDNOG SPORTSKOG SAVEZA BiH - KARLING SAVEZ BIH



U prostorijama Olimpijskog komiteta BiH održan je sastanak predstavnika Karling saveza FBiH i Karling saveza RS.

Na održanom sastanku postignut je dogovor o ubrzanim aktivnostima na formiranju Karling saveza BiH, kako bi se stekli uslovi za prijem u Olimpijsku porodicu odnosno članstvo u Olimpijski komitet BiH.

Novoformirani Karling savez BiH bio bi 38 članica Olimpijskog komiteta BiH.

ZAHVALNICA OLIMPIJSKOM KOMITETU BiH

Nakon uspješne akcije i drugih projekata podrške, Sportski savez invalida uručio je Olimpijskom komitetu BiH Zahvalnicu za doprinos i pomoć u organizaciji izbora najboljih sportista i sportskih kolektiva osoba sa invaliditetom u Bosni i Hercegovini.




AKTIVNOSTI OK BiH

NAPREDNI KURSEVI MENADŽMENTA U SPORTU

Olimpijski komitet BiH je u prethodna dva mjeseca uspješno realizovao III od ukupno VII modula u okviru projekta Naprednih kurseva menadžmenta u sportu.

Radi se o veoma obimnom edukativnom programu osmišljenom od strane Međunarodnog olimpijskog komiteta namjenjenom edukaciji kadrova koji rade u sportskoj administraciji. Kurikulum kursa je osmišljen u saradnji sa više od 150 svjetski priznatih naučnika i stručnjaka iz sportskog menadžmenta i obuhvata učenje o ključnim kompetencijama neophodnim za uspješno vođenje sportskih organizacija.



Posljednji realizovani, III modul Naprednih kurseva menadžmenta u sportu je održan u srijedu 1. i četvrtak 2. jula 2020.godine, te je tretirao temu upravljanja humanim resursima u Olimpijskim sportskim organizacijama.

Čitav tekst možete pročitati [ovdje](#).

PLANOVI KA ZAJEDNIČKOM PROJEKTNOM DJELOVANJU OK BiH I OPĆINE STARI GRAD SARAJEVO

U prostorijama Općine Stari Grad Sarajevo 08. juna 2020. godine, predsjednik Olimpijskog komiteta BiH, prof.dr Izet Rađo i načelnik Općine Stari Grad g. Ibrahim Hadžibajrić održali su sastanak sa ciljem uspostavljanja saradnje između ove dvije institucije.

Razgovor je tekao u pravcu uspješnog projektnog djelovanja obje institucije, te kako se zajedničkim aktivnostima u ovom polju može pomoći unaprijeđenju sporta prvenstveno u Općini Stari Grad Sarajevo, a potom i na šire bh. društvo. Više o sastanku pročitajte [ovdje](#).



OLIMPIJSKI KOMITET BiH U OKVIRU PROJEKTA PARAINSPIRED NABAVIO OPREMU ZA PARASPORTISTE U VISINI OD 120.000 KM

Olimpijski komitet Bosne i Hercegovine je u sklopu realizacije IPA projekta prekogranične saradnje Srbija - Bosna i Hercegovina „Socijalna integracija kroz parasport – Parainspired!“ obezbijedio za parasportiste sportsku opremu i rekvizite u vrijednosti od 120.000 KM.

Oprema se sastoji od kombija sa posebno ugrađenom rampom za lakši pristup osobama u kolicima, profesionalnih sportskih kolica za košarku, sportske opreme za sjedeću odbojku i za stolni tenis.



Primopredaja opreme se organizovala pod sloganom BE INSPIRED – PASS IT ON (Inspiriši se – proslijedi dalje), kao svojevrsna poruka Olimpijskog komiteta BiH da iza svakog sportskog uspjeha stoji izvrsnost, trud i podrška. Stoga, inspirišite se i prosljedite dalje! Pogledajte primopredaju opreme za naše parasportiste na ovom [videu](#).

OK BIH PROSLAVIO OLYMPIC DAY 2020 - DAN OLIMPIZMA



Šta je Olympic Day i zašto se slavi?

Imajući u vidu u kakvom svijetu živimo, Olimpijski dan je sjajan podsjetnik da sport može danas ujediniti i učini svijet mnogo boljim mjestom za sve nas. Cilj ove manifestacije je zapravo svjetska promocija učešća u sportovima, bez obzira na starost, pol ili fizičku spremnost. Tokom posljednjih 20 godina „Olympic Day“ je postao globalni fenomen. Od početnih 45 Nacionalnih olimpijskih komiteta, broj Olimpijskih komiteta koji sudjeluju proširio se na preko 180.

OLYMPIC DAY je mnogo više od sportskog događaja, to je svjetski dan aktivnosti kada mladi naraštaji proslavljaju olimpijske vrijednosti - izvrsnost, prijateljstvo i poštovanje, a ujedno i tri osnovna stuba Olimpijskog dana - kretanje, učenje i otkrivanje. Nacionalni olimpijski komiteti širom svijeta organizuju sportske, kulturne i edukativne aktivnosti. S obzirom na trenutnu situaciju sa COVID-19 pandemijom u svijetu, proslava ovogodišnjeg Olympic Day-a izgledala je nešto drugačije. Trinaest vrhunskih bh. sportista nam je reklo šta njima znači Olimpizam, a video možete pogledati putem ovog [linka](#).

PODRŠKA SPORTSKIM SAVEZIMA BOSNE I HERCEGOVINE

Svakom savezu po 5.000 KM u opremi ili za organizaciju Državnog prvenstva

Projekat pomoći Sportskim
strukovnim savezima BiH



Sankaški savez BiH



Ragbi savez BiH



Stonoteniski savez BiH



Odbojkaški savez BiH

Projekat pomoći Sportskim
strukovnim savezima BiH



Savez dizača tegova BiH



Bokserski savez BiH

Olimpijski komitet BiH nastavlja sa svojim aktivnostima podrške Savezima. Projekat podrške Savezima ima za cilj profesionalizirati rad sportista i Saveza, te postići unificiran izgled svih naših reprezentativaca i Saveza na međunarodnim takmičenjima.

I pored COVID-19 pandemije, OK BiH je dodijelio sportsku opremu sljedećim Savezima: Savezu klizačkih sportova, Sankaški savez, Ragbi savez, Stonoteniski savez, Streljački savez, Odbojkaški savez, Savez dizača tegova i Bokserski savez. Za više informacija pogledajte objave na [linku 1](#) i [linku 2](#).

NOVI STIPENDISTI OK BiH

OK BiH stipendira 15 sportista za OI Tokyo

Stipendije Olimpijske solidarnosti dodijeljene su atletičaru Abedinu Mujezinović, te Taekwondo savezu BiH, koji će ove stipendije koristiti za pripremu i nastupe na kvalifikacionim takmičenjima za OI Tokyo 2020 bh. taekwondoista: Marije Šetić i Dinka Šegedin.



Stipendije će biti operative od septembra 2020. godine do početka OI Tokyo 2020. Dodatne informacije i fotografije pogledajte na ovom [linku](#).

EMINA HADŽIAHMETOVIĆ ĆE BITI PREDLOŽENA ZA NAGRADU FAIR PLAY



Stonoteniserka Emina Hadžiahmetović je nakon niza povreda i dugogodišnje povrede leđa, u konsultacijama sa svojim ljekarima, odlučila da završi svoju uspješnu profesionalnu sportsku karijeru.

S tim u vezi Emina će odustati od svoje stipendije, kako bi je ustupila drugim, potencijalnim, sportistima da nastupe na OI Tokyo 2020 za Bosnu i Hercegovinu.

Emininu izjavu pogledajte [ovdje](#).

SPORTSKI SAVEZI BIH

SAVEZ KLIZAČKIH SPORTOVA BIH

U skladu sa normama Međunarodne klizačke unije (ISU), pod pokroviteljstvom Olimpijskog komiteta BiH i Fonda solidarnosti Međunarodnog olimpijskog komiteta, bivši klizači i klizačice SKSBIH su imali priliku učestvovati u edukaciji i stručnom osposobljavanju kroz „Tehnički kurs za trenere umjetničkog klizanja“.



U mjesecu julu 2020. godine SKSBIH je izdao deset odobrenja za rad - licenci trenerima u BiH. Stvaranje vlastitog trenerskog kadra omogućit će uključivanje većeg broja novih klizača u ovaj sport koji će, zahvaljujući ovoj obuci, imati kvalitetnije uslove za trening. Također, SKSBIH je definisao jedinstven program za izvođenje škola klizanja pod nazivom „Nauči i zavoli klizati“, koji pruža najbolji temelj za klizačku tehniku u umjetničkom klizanju, brzom klizanju i hokeju.

DRŽAVNO SENIORSKO PRVENSTVO U DIZANJU TEGOVA

Savez dizača tegova BiH održao je Državno seniorsko prvenstvo, ujedno i Kantonalno prvenstvo Kantona Sarajevo, 20. juna 2020. godine. Ovo takmičenje predstavlja prvo Državno prvenstvo u BiH iz bilo kojeg Olimpijskog sporta u 2020. godini u uvjetima COVID-19 restrikcija.

Čestitamo Savezu dizača tegova BiH, koji su poštivali sve restriktivne mjere na snazi uz poštivanje svih pravila Olimpijskog dizanja tegova.



17. MEĐUNARODNI TRIATLON KUP "KULIN BAN" OK BiH specijalni partner

A promotional graphic for the 17th International Triathlon Cup 'Kulin Ban'. It features a circular logo at the top center with the text 'MEĐUNARODNI TRIATLON KUP "KULIN BAN" BORAČKO JEZERO'. Below the logo, the text reads 'Dobro došli na SPRINT TRIATLON KUP "KULIN BAN"'. Further down, it says 'Poštovani dragi prijatelji, aktivni sportaši Triatlonci i ljubitelji Triatlon sporta'. At the bottom, it states 'Obavještavamo Vas da će Triatlon asocijacija u BiH organizirati 17. MEĐUNARODNI SPRINT TRIATLON KUP "KULIN BAN" BORAČKO JEZERO 2020' and '28.08-30.08.2020'. The background is a dark green and blue gradient with wavy lines.

Olimpijski komitet BiH je specijalni partner na ovogodišnjem 17. Međunarodnom Triatlon kupu "Kulin ban" Boračko jezero, koji se održava povodom 831. godišnjice donošenja Povelje Kulina bana. Termin održavanja triatlon kupa je 28. - 30.08.2020. godine, a glavna utrka će se održati 29.08.2020 sa početkom u 15:00h.

Pozivamo sve vas, ukoliko još niste, da se prijavite putem ovog linka <https://tabih-sprintbih.ba/prijava/>

EU PROJEKTI



RINGS

Za potrebe realizacije projekta RINGS održana su tri webinarima na kojima je kao partner u projektu učestvovao i Olimpijski komitet Bosne i Hercegovine.

Očekivani rezultat RINGS projekta je izrada Priručnika kojim će se moći služiti svi NOK-ovi i sportski strukovni savezi koji žele unaprijediti svoj rad.

Webinare je organizovao koordinator projekta EOC EU Office sa ciljem upoznavanja partnera sa sadržajem Priručnika:

- Organizaciona struktura u Olimpijskim svjetskim organizacijama
- Strateški menadžment Olimpijskih sportskih organizacija
- Strateška analiza NOK-ova
- Upravljanje promjenama u NOK-ovima

Prema dinamici projekta RINGS, naredne godine će OK BiH organizovati radionice za sve svoje sportske strukovne saveze, i u skladu sa kreiranim Priručnikom.

Više o EU projektima Olimpijskog komiteta BiH možete pronaći na [web stranici EU Projects](#).

Olimpijski komitet BiH učestvuje u realizaciji projekta „[Zaštita djece od nasilja u sportu - Child safeguarding in Sport](#)“, kojeg finansira i koordinira Vijeće Evrope.

U sklopu realizacije ovog projekta, OK BiH će učestvovati u uspostavljanju mreže službenih lica koji će biti zaduženi za zaštitu djece od nasilja u sportu.



U okviru projekta [SENTA](#) održan je online sastanak partnera na kojem je predstavljen dosadašnji rad članova projektnih timova, te i preliminarni izgled SENTA web platforme. Po završetku pripreme edukacijskog materijala, organizovat će se SENTA online edukacija, a koja će biti primarno namijenjena za vrhunske sportiste.



[ELIT-IN](#) projekat se nalazi u finalnoj fazi realizacije, te je održan zajednički online sastanak kako bi svi partneri revidirali svoje dosadašnje aktivnosti i pristupili ka organizaciji Završne konferencije, koja će se održati u novembru 2020. godine, ukoliko COVID-19 situacija bude dozvoljavala.



[PARAINSPIRED](#) projekat - završne aktivnosti podrazumijevaju organizaciju egzibicionih mečeva i Završne finalne konferencije. Usljed trenutne COVID-19 situacije koja uveliko otežava organizaciju okupljanja većeg broja ljudi i prelazak državnih granica, plan je da se egzibicioni mečevi organizuju posebno u BiH i Srbiji, poštujući sve mjere na snazi, dok će se Završna konferencija organizovati online.



Pratite nas na [@parainpiredproject](#) Facebook stranici.



[Muzejske priče](#) je drugi projekat sufinansiran u sklopu programa IPA CBC SRB-BiH, a među čijim korisnicima je i Olimpijski muzej.

Uzevši u obzir da se zbog mjera restrikcije nisu mogle organizovati “putujuće izložbe”, organizovane su “live chat” sesije na instagram profilu projekta, među kojima i sa g. Edinom Numankadićem, v.d. direktorom Olimpijskog muzeja.

Intervju sa MIRALEMOM PJANIĆEM

“AKO IMAŠ JAKU ŽELJU I RADIŠ NA TOME, SVE MOŽEŠ DA POSTIGNEŠ U ŽIVOTU!”

Trenutno najaktuelnija “sportska priča” je prelazak bh.reprezentativca Miralema Pjanića iz Juventusa u Barcelonu. Olimpijski komitet BiH je uspio napraviti izuzetno interesantan intervju sa našim Miralemom Pjanićem uz pomoć Nogometnog/Fudbalskog saveza Bosne i Hercegovine, na čemu im se ovom prilikom zahvaljujemo.



U Bosni i Hercegovini je sa velikim oduševljenjem primljenja vijest da ste potpisali ugovor za jedan od najboljih fudbalskih klubova svijeta. Kakav je osjećaj ostvariti dječjački san?

Miralem Pjanić: *Osjećaj da se ostvari dječjački san je nešto izuzetno emotivno. Jednostavno, radio sam cijeli život za to, dosta sam se stvari odricao od djetinjstva, ali jednostavno sam stvorio ono što sam sebi zacrtao. Nije lahak put, nije lahko biti fudbaler, a već da zamisliš da igraš u klubovima kao što je Juventus i Barcelona, za mene je to vrhunaska karijera. Neću da stanem tu gdje sam trenutno, nego želim da osvojim sve moguće kao sportista i kao fudbaler.*



Sada kada ste već igrač Barcelone, koje tri osobe van fudbalskog svijeta su Vam pomogle da ostvarite svoj cilj?

Miralem Pjanić: *Ako bih trebao izdvojiti onda su to roditelji, sin i djevojka, odnosno familija.*

A kada bi morali izdvojiti samo jednu osobu sa najviše uticaja u Vašoj sportskoj karijeri?

Miralem Pjanić: *Najviše uticaja u mojoj sportskoj karijeri sigurno je imao otac pošto je on uvijek tu, od kada sam počeo pa do sada, uvijek je bio tu uz mene i podržavao me u dobrim i teškim trenucima.*

Poznato je da BiH ima mnogo mladih, talentiranih fudbalera koji nažalost ne igraju u vrhunskim fudbalskim klubovima. Koje je vaše mišljenje po ovom pitanju?




Miralem Pjanić: *Mislim da tu jednostavno treba puno rada i truda, naravno potrebni su dobri treneri i dobri uslovi. Najviše što treba mladom fudbaleru je želja, volja, trud, jednostavno da nemaš limita. Ja nikad sebi nisam mogao reći zašto neko drugi može biti bolji od mene, zašto on može, a ja ne mogu. Mislim da ako ti želiš nešto vrlo jako i radiš na tome, sve možeš da postigneš u životu.*

Šta biste poručili mladim sportistima iz svih BiH sportskih saveza, članica Olimpijskog komiteta BiH?

Miralem Pjanić: *Naravno, vrlo je bitan dobar rad i pametan rad, dobri uslovi. Važno je imati trenere koji su uvijek na najvećem nivou i koji stalno uče neke nove stvari pošto sport napreduje i jednostavno nije kao prije 20, 30 godina. Zadnjih godina je mnogo napredovao i svi treneri sad moraju da prate nove stvari, da uče što je najbitnije, a pored trenera i sportaši, djeca i svako ko se bavi sportom. Kako sam ja dostigao ovo što jesam, mislim da je najbitnije imati vjeru u sebe, da ti vjeruješ i da imaš želju, da ne stavljaš sebi neki limit. Zašto neki španac, nijemac, brazilac ili neko drugi mora biti ispred nas? Jednostavno svako može ostvariti svoj cilj ako želi, nema tu odakle si šta si i ko si, nego jednostavno koliko truda i rada ulažeš u sve to što želiš postići.*



ZAVIRITE U DRUŠTVENE MREŽE OK BiH (klikom na sliku)



Olimpijski komitet BiH je početkom mjeseca juna organizovao nagradnu igru na svojim društvenim mrežama. Preko 500 osoba je uzelo učešće, a dva sretna dobitnika osvojila su dio sportske opreme OK BiH.

Pratite nas na društvenim mrežama:
(klikom na ikone)



©2020. Olimpijski komitet Bosne i Hercegovine. Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.

